

BOSNA I HERCEGOVINA
Federacija Bosne i Hercegovine
Agencija za reviziju privatizacije u Federaciji Bosne i Hercegovine

STRATEŠKI PLAN RADA

Agencije za reviziju privatizacije u Federaciji Bosne i Hercegovine

Sarajevo, juni 2014. godine

SADRŽAJ

Uvod.....	3
1. VIZIJA, MISIJA I STRATEŠKI CILJEVI.....	5
2. OSNOVNI POSTUPCI REVIZIJE I KRITERIJI ZA OCJENU POSTUPAKA PRIVATIZACIJE.....	6
2.1. Osnovni postupci revizije	6
2.1.1. Izbor subjekata revidiranja.....	6
2.1.2. Planirani tok revizije.....	7
2.1.3. Radnje, mjere i postupci prema izvršenoj reviziji	8
2.2. Kriteriji za ocjenu postupaka privatizacije	9
3. ZADACI I OSTVARENJE ZADATAKA AGENCIJE ZA REVIZIJU.....	10
3.1. Zadaci Agencije za reviziju privatizacije	10
3.2. Transparentnost rada i poslovi informatike Agencije	11
3.3. Sredstva za rad, organizacija i učinkovitost rada Agencije	11
3.3.1. Učinkovitost i kritični faktori uspjeha	12

Uvod

Izrada Strateškog plana rada obaveza je svih tijela federalnih institucija pa tako i Agencije za reviziju privatizacije (u daljem tekstu: Agencija) i to na osnovu člana 14. stav 1. Zakona o reviziji privatizacije državnog kapitala u privrednim društvima i bankama („Službene novine Federacije BiH“ broj 55/12)¹. kao i na osnovu Uredbe Vlade Federacije BiH člana 6. stav 3. tačka c. od 13. februara 2014. V broj 274/2014)².

Postupak revizije prema Zakonu o reviziji privatizacije dužna je da obavi Agencija za reviziju privatizacije u svim privrednim društvima i bankama u razdoblju od pet godina od dana usvajanja zakona.

Prema odredbama Zakona o reviziji privatizacije, pod revizijom privatizacije podrazumjeva se naknadni proces ispitivanja i ocjene ispravnosti procesa privatizacije privrednih društava i banaka u Federaciji Bosne i Hercegovine koji obuhvata:

- a) postupke i pismena Vlade Federacije Bosne i Hercegovine, Agencije za privatizaciju, Agencije za bankarstvo, Federalnog ministarstva financija - Federalnog ministarstva finansija, Jedinice za privatizaciju banaka, Komisije za vrijednosne papire i Registra vrijednosnih papira kao i odluka i postupaka drugih organa Federacije Bosne i Hercegovine i kantona,
- b) procedure u pripremi i provedbi privatizacije privrednih društava i banaka,
- c) dokumente (poslovne i knjigovodstvene isprave), poslovne knjige i računovodstvene iskaze/financijske izvještaje, ispitivanje dokumenata, odluka, poslovnih knjiga, ugovora i akata, na temelju kojih je obavljena pretvorba i privatizacija, kao i druge dokumentacije radi utvrđivanja je li u postupku pretvorbe i privatizacije došlo do povrede odredbi Zakona o privatizaciji, Zakona o društvenom kapitalu ili posebnih zakona.
- d) financijske i računovodstvene transakcije koje se odnose na privatizaciju privrednih društava i banaka,
- e) način raspolaganja novčanim sredstvima ostvarenim prodajom privrednih društava i banaka, zaključene ugovore o privatizaciji i vjerodostojnu dokumentaciju o izvršavanju ugovorenih obveza,
- f) identifikaciju stvari, prava, potraživanja i obaveza iz pasivnog podbilansa i način raspolaganja sa istom (stvari i prava sa pripadajućim kapitalom privrednih društava, privatiziranih i ne privatiziranih, koja nisu pod kontrolom te nisu bila uključena u aktivni podbilans, a nalaze se na teritoriji država nastalih raspadom bivše Socijalističke Federativne Republike Jugoslavije, potraživanja

¹ Zakon o reviziji privatizacije državnog kapitala u privrednim društvima i bankama („Službene novine Federacije BiH“ broj 55/12) donesen je u aprilu 2014. godine, a stupio na snagu u junu 2014. godine.

² Uredba o osnovama organizacije i načinu poslovanja Agencije za reviziju privatizacije u Federaciji Bosne i Hercegovine („Sl.novine F BiH“, br. 16/14) usvojena na 42. hitnoj sjednici Vlade FBiH od 13.02.2014. godine, a ista je stupila na snagu 28.02.2014. godine.

- i obaveze nastalih do 31.03.1992. godine, prema pravnim osobama iz država nastalih raspadom bivše Socijalističke Federativne Republike Jugoslavije),
- g) promjene obavljanja djelatnosti privrednih društava suprotno uvjetima iz ugovora o prodaji.

Ciljevi revizije privatizacije određeni su Zakonom o reviziji privatizacije i odnose se na zaštitu prava građana utvrđenih Ustavom Federacije Bosne i Hercegovine državne svojine u procesu privatizacije u FBiH i javnog interesa zaštićenih vrednota, ukupnog pravnog poretka, javnog morala te postizanja ciljeva propisanih odredbama člana 4. Zakona o reviziji privatizacije na način da se utvrdi je li u postupku privatizacije došlo do povrede odredbi Zakona o privatizaciji.

Agencija će se u ovom planu rada na provedbi revizije privatizacije pridržavati opisa osnovnih postupaka revizije te kriterija za ocjenu postupaka privatizacije. U svome radu najprije će se analizirati očekivanja podnositelja zahtjeva kao i učinci privatizacije, a nakon toga analiza procesa pretvorbe i privatizacije te podaci o podnesenim prijavama nadležnom državnom tužilaštvu ili drugom nadležnom tijelu, u slučajevima kada bude ocijenjeno postojanje osnovane sumnje da pojedine radnje imaju obilježje kaznenog djela, privrednog prestupa ili prekršaja. Na kraju, u svojim izvještajima će se dati popis subjekata za koje je Agencija za reviziju privatizacije izdala posebno mišljenje o ispravnosti provedene pretvorbe i privatizacije.

Upravo zato ova Agencija mora raditi više, premda s ograničenim resursima, a budući da želimo radi cjelokupne javnosti kako domaće tako i strane ovaj posao uraditi što kvalitetnije i odgovornije to moramo činiti i brže i učinkovitije. Time pomažemo ekonomiji da poveća svoju konkurentnost kako na domaćem, ali još važnije, na međunarodnom tržištu. Time potičemo nove ulaske na tržište, a pomažemo izlazak s tržišta onima čije troškove tržište ne prihvata. Svrha je ovoga plana rada postaviti ključne ciljeve, nama, Agenciji za reviziju privatizacije, ali i svima zainteresiranima u tom procesu, posebno javnosti, Vladi FBiH, ali i široj javnosti.

Pouzdanost, učinkovitost i kredibilitet revizije privatizacije bit će naše vrijednosti.

Ciljeve i zadatke utvrdit ćemo na realnim osnovama i razumnoj procjeni nastupajućeg razdoblja. S obzirom na spomenuta budžetska i administrativna ograničenja vjerujemo da ćemo ih uspjeti ostvariti. U tom smislu bit ćemo transparentni u svom radu, otvoreni za sve institucije i stručnu javnost pa vjerujem da će se uspješan rad Agencije za reviziju privatizacije i strateški ciljevi i prioritete ostvariti i u nastupajućem razdoblju.

1. VIZIJA, MISIJA I STRATEŠKI CILJEVI

Agencija za reviziju privatizacije u Federaciji Bosne i Hercegovine nezavisno je i samostalno tijelo čije se zadaće odnose na reviziju privatizacije u skladu sa odredbama Zakona o reviziji privatizacije i Zakona o reviziji institucija u Federaciji Bosne i Hercegovine. Agencija za reviziju u okviru svoje nadležnosti ima javna ovlaštenja za donošenje pojedinačnih upravnih akata u skladu sa Zakonom o upravnom postupku. U tom smislu, jasno je određena vizija, misija i ciljevi djelovanja Agencije.

Vizija Agencije za reviziju privatizacije je djelotvorno izvršiti reviziju privatizacije na efikasan i efektivan način te doprinjeti povećanju opšteg i zajedničkog dobra provjerom zakonitosti u procesu privatizacije državne svojine.

Drugim riječima, naša je vizija omogućiti javnosti na transparentan način cjelokupan presjek izvršene privatizacije u cjelokupnom obimu te dati doprinos razvoju BiH društva kroz uspostavu provjere procesa privatizacije i utvrditi nepravilnosti prilikom istih, a isto tako prezentovati i one privatizacije koje su uspješno provedene.

Misija Agencije za reviziju privatizacije u FBiH je osigurati da se na profesionalan i učinkovit način te u skladu sa međunarodno priznatim standardima revizije i najboljim praksama u EU provede revizija privatizacije kako bi se utvrdio naknadi proces ispitivanja i ocjene ispravnosti procesa privatizacije privrednih društava i banaka u Federaciji Bosne i Hercegovine. Agencija će pomoći tržištu da funkcioniše bolje, i to učinkovitom provedbom revizije privatizacije. Povećanje razine vladavine prava na području revidiranih procesa i sagledavanja cjelokupnog procesa privatizacije bit će posljedica našeg djelovanja. Misiju ćemo ostvariti provedbom:

- a) utvrđivanja zakonitosti u procesu privatiziranja državnog kapitala,
- b) provjere zaključenih ugovora i ispunjavanja obaveza ugovornih strana,
- c) zaštite javnog interesa u procesu privatiziranja državnog kapitala,
- d) zaštite stvari i prava sa pripadajućim kapitalom privrednih društava i banaka (privatiziranih i ne privatiziranih, koja nisu pod kontrolom te nisu bila uključena u aktivni podbilans, a nalaze se na teritoriji država nastalih raspadom bivše Socijalističke Federativne Republike Jugoslavije i naplata potraživanja nastalih do 31.03.1992. godine, prema pravnim osobama iz država nastalih raspadom bivše Socijalističke Federativne Republike Jugoslavije),
- e) spriječavanja nezakonitog raspolaganja novčanim sredstvima ostvarenim prodajom privrednih društava i banaka,
- f) spriječavanja nezakonitog sticanja imovine/imovinske koristi u postupku privatizacije državnog kapitala,
- g) oduzimanja nezakonito stečene imovine/imovinske koristi u postupku privatizacije državnog kapitala,

- h) utvrđivanja odgovornosti odgovornih osoba u organima državne uprave, upravnim organizacijama, drugim organizacijama i institucijama Federacije Bosne i Hercegovine i kantona, privrednim društvima i bankama.

Cilj Agencije za reviziju privatizacije je osigurati da se na učinkovit način ispita i ocjeni da li je proces privatizacije izvršen na odgovarajući način i u skladu sa zakonskim procedurama te da li je nakon izvršene privatizacije u privrednim društvima i bankama došlo do povrede ugovorenih prava i obaveza.

Za razdoblje od pet godina, Agencija je u okviru svojih zakonskih ovlasti i obaveza učinkovitog i brzog izvršavanja povjerenih joj zadataka utvrdila četiri ključna strateška cilja koja će joj pomoći u realizaciji ostvarenja njezinih ciljeva:

- Donijeti podzakonske akte Agencije i kontinuirano osiguravati financijska sredstva za rad Agencije za svaku narednu godinu;
- Upošljavati revizorsko i administrativno osoblje koje ispunjava uslove za obavljanje poslova iz njene nadležnosti, u skladu sa posebnim uslovima utvrđenim Pravilnikom o unutrašnjoj organizaciji i sistematizaciji radnih mjesta Agencije;
- Izvršiti profesionalno i odgovorno proces revizije privatizacije privrednih društava i banaka u cjelokupnom obimu u skladu sa Zakonom o reviziji privatizacije državnog kapitala u privrednim društvima i bankama;
- U toku revizije privatizacije, a u skladu sa zakonskim obavezama, izvještavati Vladu FBiH, Parlament Federacije BiH i cjelokupnu javnost o procesima revizije u vidu izvještaja (polugodišnjih, godišnjih i završnog izvještaja).

2. OSNOVNI POSTUPCI REVIZIJE I KRITERIJI ZA OCJENU POSTUPAKA PRIVATIZACIJE

2.1. Osnovni postupci revizije

Osim Zakonom o reviziji privatizacije, koji je usvojen u aprilu 2012. godine, a primjenjuje se od juna iste godine, postupci revizije privatizacije određeni su INTOSAI - revizijskim standardima te Kodeksom profesionalne etike revizora i drugim propisima koji uređuju pravila i metodologiju rada Agencije za reviziju privatizacije.

2.1.1. Izbor subjekata revidiranja

Redoslijed obavljanja revizija Agencija će utvrditi na osnovu veličine preduzeća (prema visini osnovnog kapitala i ukupnih prihoda te prema broju zaposlenika) koji će predstavljati osnovni kriterij kojeg će se Agencija za reviziju pridržavati pri izboru

subjekata revidiranja, tako da će se prema zahtjevima ovlaštenika obaviti revizija velikih (sa liste prioriteta), zatim srednje velikih i na kraju manjih subjekata.

2.1.2. Planirani tok revizije

Postupci revizije privatizacije započinjat će prikupljanjem dokumentacije potrebne za proces revizije. Kako su u postupcima privatizacije, osim privrednih društava i banaka koja su bila predmet privatizacije, izravno ili neizravno sudjelovale i brojne pravne i fizičke osobe te tijela državne uprave, kao i osobe s javnim ovlastima, tako će se i dokumentacija za provedbu revizije prikupljati kod svih navedenih subjekata. Najveći dio podataka i dokumenata pribavit će se od federalne Agencije za privatizaciju i kantonalnih agencija, Agencije za bankarstvo, zatim kod privrednih društava i banaka kod kojih će se obaviti revizija, te od ostalih relevantnih institucija i organa koji su učestvovali u procesima privatizacije.

Najvažniji podaci i dokumenti u privrednim društvima i bankama kao i u organima i institucijama za privatizaciju na osnovu kojih će se obaviti revizija bit će:

- a) knjigovodstvena vrijednost državnog kapitala prema početnom bilansu stanja privrednih društava i banaka,
- b) promjene koje su nastale na kapitalu kao i druge materijalno značajne promjene na imovini i obavezama, od dana utvrđivanja početnog bilansa stanja do dana privatizacije i od dana privatizacije do dana završetka revizije,
- c) vrijednost i način raspolaganja imovinom iz pasivnog podbilansa od strane privrednog društva i drugih subjekata,
- d) ispunjavanje ugovornih obveza od strane kupca definiranih ugovorom o prodaji državnog kapitala,
- e) da li su od dana pokretanja do okončanja procesa privatizacije aktivnosti nadležnih nositelja procesa privatizacije i kupca bile u skladu sa važećim propisima.

Također će se u procesu revizije privatizacije pored navedenih dokumenata tražiti i sljedeća dokumentacija:

- dokumentacija o pretvorbi vlasništva u privrednim društvima gdje je pretvorba izvršena prije donošenja Zakona o privatizaciji preduzeća;
- odluka organa upravljanja o pretvorbi sa svim obaveznim priložima;
- rješenja ili suglasnosti Agencija (Agencija za privatizaciju),
- zapisnik s osnivačke skupštine,
- statut (sa svim izmjenama i dopunama, s datumima primjene izmjena i dopuna),
- rješenja suda o upisu u sudski registar,
- podaci o dionicama (broj, nominalna vrijednost, serija, vrsta, rod) ili udjelima,
- ugovori o kupnji dionica, odnosno udjela na osnovu kojih je izvršen upis u knjigu dionica ili u knjigu udjela,

- podaci o sticanju vlastitih dionica (odluke skupštine, ugovori ili drugi dokumenti na osnovu kojih su stečene vlastite dionice),
- ugovori o prijenosu dionica, odnosno udjela na temelju kojih su evidentirane
- promjene u knjizi dionica ili knjizi udjela,
- dokumentacija o dokapitalizaciji (ugovori, odluke skupštine, virmanski nalozi o uplatama gotovine, procjena vrijednosti imovine koja se unosi),
- dokumentacija o pretvaranju potraživanja u udjel (odluke, pravno utemeljenje potraživanja, ugovor o pretvaranju potraživanja u ulog i mišljenje komercijalne revizije),
- knjiga dionica ili knjiga udjela sa svim promjenama,
- popis članova uprave, upravnih i nadzornih odbora, s datumima imenovanja i razrješenjima,
- ugovori o prodaji nekretnina, zajedno s odlukama nadležnih tijela,
- podaci o zahtjevima prijašnjih vlasnika za povrat imovine koja se nalazi u imovini društva,
- izvještaji revizorskih kuća i interne revizije,
- analitička evidencija dugotrajne imovine za sve godine od pretvorbe, uključujući podatke o smanjenju vrijednosti i amortizaciji,
- analitička evidencija kupaca i dobavljača za sve godine od pretvorbe,
- popis privrednih društava u kojima je društvo nastalo pretvorbom ili većinski vlasnik ima vlasnički ili suvlasnički udjel, te dokumenti, evidencije i finansijski izvještaji potrebni za provedbu revizije osnivanja i revizije poslovanja za sva navedena privredna društva i banke.

2.1.3. Radnje, mjere i postupci prema izvršenoj reviziji

Na osnovu prikupljenih podataka, utvrdit će se sve značajne činjenice vezane najprije uz pretvorbu vlasništva privrednih društava i banaka koje su utvrđene kao prioritet prema listi Vlade FBiH. Postupak revizije najvećim dijelom će se odnositi na provjeru dokumentacije, koju su privredna društva, uz odluku o pretvorbi, bila obavezna dostaviti relevantnim organima i institucijama. U ovoj fazi, obaviti će se provjera zakonitosti provedenog postupka pretvorbe privrednog društva sa liste prioriteta, a to će biti praksa i za sva druga privredna društva i banke koje budu u procesu revizije.

Sljedeća faza revizije obuhvatat će provjeru postupaka privatizacije, odnosno provjeru promjene vlasničke strukture dionica ili udjela, dokapitalizaciju, sanaciju ili stečaj društva ili banke. U ovoj fazi analizirat će se osnovni pokazatelji poslovanja na osnovu finansijskih izvještaja, kako bi se provjerilo ostvarenje razvojnog programa ciljeva privatizacije u Federaciji Bosne i Hercegovine.

Nakon što se obavi revizija privatizacije za konkretno privredno društvo ili banku, pristupit će se izradi izvještaja o obavljenoj reviziji pretvorbe i privatizacije.

Metodološki, svi izvještaji biti će sastavljeni na istovjetan način i u pravilu će se sastojati od šest dijelova.

U prvom dijelu bit će navedena zakonska regulativa na osnovu koje je privredno društvo ili banka trebalo obaviti pretvorbu i privatizaciju. U drugom dijelu navest će se osnovni podaci o poslovanju privrednog društva u vrijeme pretvorbe, podaci o statusnim promjenama koje su nastale u razdoblju od pretvorbe privrednog društva do dana obavljanja revizije, te podaci o vlasnički povezanim društvima. U trećem dijelu opisan će se postupak pretvorbe sa svim nepravilnostima koje su revizijom utvrđene. Četvrti dio izvještaja će se odnositi se na reviziju postupaka privatizacije, a obuhvatat će sve promjene vlasničke strukture nastale nakon pretvorbe privrednog društva, dokapitalizaciju, sanaciju i stečaj društva. U petom dijelu izvještaja prezentirati će se podaci o poslovanju društva i vlasničkoj strukturi u vrijeme obavljanja revizije. U šestom dijelu izvještaja, a nakon provedenog postupka i na temelju utvrđenih činjenica i prikupljenih dokaza u procesu revizije, a prije završetka konačnog revizorskog izvještaja, Agencija će pripremiti nacrt izvješća o reviziji kojeg će dostaviti upravi privrednog društva ili banke na komentar. Nakon razmotrenih komentara uprave privrednog društva, banke ili rukovodioca organa, organizacije i institucije, odnosno prije pripreme konačnog izvještaja i u slučajevima neslaganja, u konačan izvještaj, Agencija će uključiti njihove relevantne komentare i dati revizorsko mišljenje o provedenoj reviziji privatizacije privrednih društava i banaka.

Pojedinačni izvještaji sastavljeni su u skladu s odredbama Zakona o reviziji privatizacije i pravilima revizorske struke, sadržavat će sve značajne podatke na osnovu kojih su ocijenjeni postupci pretvorbe i privatizacije. Također, izvještaji će sadržavati podatke o osobama koje su bile odgovorne za provedbu privatizacije, nazive pravnih osoba ili imena fizičkih osoba koje su obavile procjenu vrijednosti poduzeća, imena osoba odgovornih za utvrđene nepravilnosti, te vlasničku strukturu u vrijeme privatizacije i u vrijeme obavljanja revizije. U izvještaju će biti navedena i vlasnički povezana društva, kao i odgovorne osobe u tim društvima.

2.2. Kriteriji za ocjenu postupaka privatizacije

Kriteriji za ocjenu postupaka privatizacije određeni su Zakonom o privatizaciji preduzeća („Službene novine Federacije BiH,“ br. 27/97, 8/99, 32/00, 45/00, 54/00, 61/01, 27/02, 33/02, 28/04, 44/04, 42/06 i 4/09), te drugim zakonskim propisima.

Pri utvrđivanju kriterija za ocjenu postupaka privatizacije koristit će se dokumentacija koju su privredna društva i banke bila obvezna dostaviti Agenciji za privatizaciju u Federaciji BiH i kantonalnim agencijama.

To su sljedeći dokumenti:

- odluka o pretvorbi privrednog društva ili banke;
- elaborat o procjeni vrijednosti privrednog društva ili banke;
- kupoprodajni ugovor;

- razvojni program,
- osnovni podaci o privrednom društvu ili banci,
- dokazi o pravu vlasništva ili pravu korištenja nekretnina,
- vrijednost i način raspolaganja imovinom iz pasivnog podbilansa;
- izvještaj o realnosti podataka iskazanih u finansijskim izvještajima za godinu koja prethodi godini u kojoj se obavlja procjena vrijednosti poduzeća,
- druga dokumentacija koja se odnosi na privatizaciju pojedinog privrednog društva ili banke.

Uz spomenutu dokumentaciju, važan akt, kod utvrđivanja kriterija za ocjenu postupaka pretvorbe i privatizacije je i potvrda ili rješenje Agencija za privatizaciju, kojom se privrednom društvu daje suglasnost na namjeravanu privatizaciju. Pri donošenju ocjene korišteni su i drugi propisi koje je donijela Agencija ili neka druga državna institucija, a odnose se na proces privatizacije.

U nastavku ovog plana rada Agencije za ovu godinu, planirano je da se najprije prikupi sva dokumentacija koja je bitna za proces revizije privatizacije i uradi sveobuhvatna analiza rezultata i posljedica dosadašnjih procesa privatizacije. Takvu analizu nije niko do sada uradio. Analizom će se utvrditi pozitivni efekti privatizacije, ali i brojni problemi i negativne posljedice koje je proizvela dosadašnja privatizacija. Zahtjevat će se dostava svih dokumenata kako od agencija za privatizaciju federalnih i kantonalnih, Agencije za bankarstvo, tako i od ostalih organa i institucija koje su direktno ili indirektno učestvovala u procesu privatizacije državnog kapitala. Po okončanju prikupljanja dokumentacije, planski će, uz koordinaciju tima, usaglasiti dinamika i tempo prioriteta u pogledu revidiranja privrednih društava i banaka.

Procjene Agencije su da je za jedan revizorski izvještaj sa svim kompletnim zakonskim procedurama potrebno u prosjeku od dva do dva i pol mjeseca da se izvrši revizija u privrednom društvu ili banci s tim da će se revizija vršiti u planiranoj dinamici paralelno u više privrednih društava i u skladu sa brojem revizora odnosno uposlenika Agencije. Bitno je naglasiti da će dinamika i tempo revizije privrednih društava i banaka najviše zavisiti od prijema uposlenika i od toga kada će Agencija profunkcionisati u punom kapacitetu, a sve na osnovu planiranih budžeta za svaku godinu.

3. ZADACI I OSTVARENJE ZADATAKA AGENCIJE ZA REVIZIJU

3.1. Zadaci Agencije za reviziju privatizacije

Zadaci Agencije za reviziju koji proizlaze iz Zakonom o reviziji privatizacije državnog kapitala u privrednim društvima i bankama („Službene novine Federacije BiH“, broj 55/12) i Zakona o reviziji institucija u Federaciji Bosne i Hercegovine („Službene novine Federacije Bosne i Hercegovine“, broj 22/06) su:

- a) provesti reviziju privatizacije u subjektima koji su određeni članom 5. Zakona o reviziji privatizacije;
- b) utvrditi da li je u postupku pretvorbe i privatizacije došlo do povrede odredbi Zakona o privatizaciji, Zakona o državnom kapitalu ili posebnih zakona;
- c) Agencija za reviziju dužna je najmanje jedanput godišnje Vladi Federacije podnijeti izvještaj o vršenju povjerenih javnih ovlaštenja (član 9. stav 3. Zakona);
- d) Agencija za reviziju dužna je svakih šest mjeseci, putem Vlade Federacije, informisati Parlamentarnu komisiju Federacije Bosne i Hercegovine, Parlament Federacije Bosne i Hercegovine o izvršenim revizijama privatizacije državnog kapitala privrednih društava i banaka u Federaciji Bosne i Hercegovine. (član 13. Zakona);
- e) Izvještaj o izvršenju programa rada za prethodnu godinu Agencija je dužna dostaviti Parlamentu Federacije Bosne i Hercegovine najkasnije do 30. marta tekuće godine (član 14. stav 2. Zakona);
- f) dati mišljenje kojim će se potvrditi ispravnost provedbe pretvorbe i privatizacije u slučajevima kada se revizijom utvrdi da su postupci pretvorbe i privatizacije provedeni u skladu sa zakonom i drugim propisima (član. 17. stav 1. Zakona);
- g) pokretati upravne postupke, upravne i parnične sporove radi izmjene, poništenja ili ukidanja rješenja i zaključenih ugovora o privatizaciji državnog kapitala privrednih društava i banaka, privremenom osiguranju nezakonito stečene imovine/imovinske koristi i povratu, odnosno oduzimanju nezakonito stečene imovine/imovinske koristi (član. 18. Zakona);
- h) podnijeti prijave nadležnom federalnom tužilaštvu ili drugom nadležnom tijelu, u slučajevima kada je revizijom utvrđeno postojanje radnji koje imaju obilježja kažnjivih djela (član. 19. Zakona).

3.2. Transparentnost rada i poslovi informatike Agencije

Preduvjet efikasnosti odluka Agencije je transparentnost njezina rada. Publikovanje informacija o aktivnostima vezanim uz provedbu zakona iz njezine nadležnosti ključno je jer omogućuje javnosti uvid u učinkovitost Agencije u ispunjavanju strateških ciljeva zbog koje je i osnovana. S tim u vezi aktivnosti će biti usmjerene i na: nabavku računarske opreme, održavanje računarskih stanica, instalaciju aplikativnih modula, zatim održavanje hardvera i softvera, administriranje bazama podataka, održavanje lokalne računarske mreže u ARP-u i podrška korisnicima, evidencija računarske opreme, izrada i održavanje web stranice arp.gov.ba i redovni update sistemskog i antivirusnog softvera.

3.3. Sredstva za rad, organizacija i učinkovitost rada Agencije

Sredstva potrebna za rad Agencije za reviziju privatizacije u FBiH, osiguravaju se u budžetu Federacije Bosne i Hercegovine na osnovu člana 11. Zakona. Za svaku godinu ona se planiraju u finansijskom planu i dostavljaju Ministarstvu finansija na usvajanje, od čega se cijeli iznos osigurava iz budžeta Federacije BiH jer Agencija je

neprofitna organizacija i nema mogućnost priliva sredstava iz drugih izvora. Pošto je Agencija u ovoj godini zvanično i započela sa radom, sredstva koja su se trebala obezbjediti iz budžeta, neće biti operativna, iz tog razloga neophodno je iz tekućih rezervi budžeta FBiH obezbjediti sredstva za početak rada.

Prema, planu i operativnim sredstvima za početak rada Agencije planirano je da se u Agenciji zaposli do kraja 2014. godine 11 uposlenika, pet na poslovima revizije i 5 u administraciji i direktor sa svojim ovlastima. Prema planu unutrašnje organizacije i sistematizacije radnih mjesta, optimalan broj zaposlenih na navedenim poslovima, je 28 dok je sistematizovanih radnih mjesta 17. Uredbom Vlade Federacije BiH o osnovama organizacije i načinu poslovanja Agencije za reviziju privatizacije u Federaciji BiH, uređena je organizacija i način poslovanja. Ovlasti direktora, poslovi stručnih službi i ostala pitanja vezana uz organizaciju, upravljanje i rukovođenje radom Agencije, detaljno su razrađeni pravilnicima i drugim aktima kao što je unutrašnja organizacija, sistematizacija radnih mjesta i druga pitanja koja se odnose na radne odnose i funkcionisanje Agencije. Svi akti predviđeni Uredbom donijet će se nakon dobijene saglasnosti Vlade Federacije BiH.

U odnosu na unutrašnju organizaciju, rad Agencije organizovan je u 3 sektora. S obzirom na prioritete u radu ističe se uloga sektora za finansijsku reviziju i sektora za pravnu reviziju. Također, radi postizanja specijalizacije i brzine rješavanja svakog predmeta u Agenciji je osnovan posebni sektor za: opšte, pravne i administrativne poslove sve u cilju optimiziranja rukovođenja Agencijom koja predviđa neposredniju upravljačku strukturu, a u prvi plan stavlja stručnost i odgovornost svakog uposlenika u pripremi odluka i obradi predmeta.

Aktivnosti opšte službe Agencije će biti usmjerene na:

1. Praćenje primjene zakona, podzakonskih akata i drugih propisa i općih akata koji se odnose na finansijsko, računovodstveno, kancelarijsko i arhivsko poslovanje Agencije.
2. Vođenje finansijsko-računovodstvenih poslova i u tom pogledu:
 - izrada finansijskih planova i izvještaja;
 - prikupljanje, sastavljanje, obrada evidencija i kontrola knjigovodstvenih isprava;
 - vođenje poslovnih knjiga;
 - popis imovine i obaveza;
3. Vođenje stručno-administrativnih, tehničkih i drugih pomoćnih poslova iz nadležnosti Agencije.

3.3.1. Učinkovitost i kritični faktori uspjeha

Kritični faktori uspjeha ostvarenja ciljeva u radu Agencije za mandatni period, odnose se na početak rada Agencije, zaposlene i finansiranje, političko okruženje i ostale politike, te pravni sistem. Ključ uspjeha ostvarenja ciljeva i učinkovitosti Agencije zavisi o zaposlenima kao njezinom najvažnijem resursu. Izazov će biti upošljavanje

stručnog kadra. Javna i politička svijest o koristima revizije privatizacije centralni je cilj, pa je donošenje Uredbe i početak rada Agencije kao i njena uloga od strane Vlade Federacije BiH važan način u ostvarenju ciljeva ulaska u evropske integracije. Takvo priznanje ima neprocjenjiv utjecaj na uspješnost i učinkovitost. Zato je osim nastojanja Agencije da izvrši sveobuhvatnu reviziju privatizacije na profesionalan i odgovoran način, neophodno javno i političko okruženje koje će nas osnažiti u provođenju postupaka našeg rada, što će opet podići svijest i o tome što primjereno političko okruženje i međudjelovanje ostalih politika može učiniti za postizanje naših strateških ciljeva. Na kraju, naš rad ovisi i o pravnom sistemu, u ovom slučaju i sudovima i sudskim odlukama koje su neophodno sredstvo za brzo i učinkovito rješavanje problema nelegalno izvršene privatizacije.